



Inatsisartut aalajangiiffigisassaattut siunnersuut Naalakkersuisut peqquneqassasut akileraartarnermi aaqqissuusseqqinnissamut siunnersuuteqassasut, akileraartarnermut ingerlatsineq ajornannginnerusoq, Kalaallit Nunaanni akileraarut ataatsimoortumik apparluni aammalu aningaasarsianut akileraarutit appartinneri ilaliullugu. Siunnersuut UPA 2023-mut saqqummersussanngorlugu suliarineqassaaq.

(Inatsisartunut ilaasortaq Jens-Frederik Nielsen, Demokraatit)

(Siullermeerneqarnera)

Demokraatit Inatsisartunut ilaasortaataitaannut Jens-Frederik Nielsen-imut siunnersuuteqarneranut qujanaq.

Oqareerlanga, paatsuungasoqaqqunagu; Demokraatit akileraartarnikkut aaqqissuusseqqinnissamik piumasagarput taassumalu pinngitsoorani qulakkiissagaa, innuttaasut namminneq aningaasaateqarnerulernissaat. Nuannaarutigaarput, kalaallit taama amerlatigisut ullut tamaasa suliaartortarmata atugarissaarnerulernissatsinnut tapeeqataallutik. Taakku inuit suleruluttut ullumimiit annertunerusumik aningaasaanik amerlanerusunik pissarsinissaat naleqqulluinnarpoq.

Taassuma piviusunngortinnissaanut periutsit arlaqarput. Isertitanit akileraarut appartissinnaavarput. Sulinermi ilanngaasut qaffassinnaavarput. Inummut ilanngaasut qaffassinnaavarput. Arlaannaalluunniit toqqaraluarutsigu, kinguneqassaaq, kalaallip qaammatit tamaasa imminut atugassaminik aningaasaateqarnerulernera. Tamanna Demokraatinut pitsassuusaaq.

Taamaatumilluuna, kissaatigigipput Naalakkersuisut pisussaatinneqassasut taamatut tunaartaqarlutik sulissasut.

Tamanna tunngavigalugu uggoraara, Naalakkersuisut Inatsisartunut ilaasortap Jens-Frederik Nielsenip siunnersuutaanik annikillisaanerat. Naalakkersuisummi allannguutissatut siunnersuutiminni siunnersuut "isumaliuutiginnarnissaa" –nik pituttuinnarusummata. Isumaqarpunga, kialluunniit atuarsinnaagaa tusaasinnaagaalu, Naalakkersuisut allannguutissatut siunnersuutaat Naalakkersuisunut sunnguamilluunniit pituttuisussaangitsoq. Siunnersuummilu tamanna siunertaangilaq.

Tamanna tunngavigalugu siunnersuut allanngortinnagu akuerisassatut innersuusutigaarput Aningaasaqarnermut- Akileraartarnermullu ataatsimiititaliamut suliareqqitassanngorlugu. Naalakkersuisut allannguutissatut siunnersuutaat itigartinneqassasoq innersuusutigaarput.